

四庫全書

子部

欽定四庫全書

子部

太平廣記卷二百

二十四至  
三十

詳校官中書臣潘有為

侍讀臣孫球覆勘

總校官進士臣楊懋珩

校對官中書臣鮑之鍾

謄錄監生臣袁繼升

欽定四庫全書

太平廣記卷二百二十四

相四

王正君

黃霸

賣鮓媪

蘇氏女

武后

李淳風

楊貴妃

姜皎

常袞

劉禹錫

鄭朗

令狐綯門僧

僧處弘

范氏尼

任之良

殷九霞

相手板庾道敏

李參軍

龍復本

王正君

相婦人

漢王莽姑正君許嫁至期當行時夫輒死如此者再乃  
獻之趙王未取又薨後有與正君父穉君善者過相正  
君曰貴爲天下母是時宣帝世元帝爲太子穉君乃因  
魏郡尉納之太子太子幸之生子宣帝崩太子立正君  
爲皇后上爲太子元帝崩太子立是爲成帝正君爲皇

太后竟爲天下母

出論  
衡

### 黃霸

黃霸爲陽夏游徼與善相者同車俱行見一婦人年十七八相者指之曰此婦人當富貴爲封侯者夫人公止車審視之相者曰令此婦人不富貴卜書不用也次公問之乃其傍里人巫家子也即娶爲妻其後次公果大富貴位至丞相封爲列侯

出論  
衡

### 賣鮓媪

唐馬周字賓王少孤貧明詩傳落魄不事產業不爲州里所重補博州助教日飲酒刺史達奚怒屢加咎責周乃拂衣南遊曹汴之境因酒後忤浚儀令崔賢又遇責辱西至新豐宿旅次主人唯供設諸商販人而不顧周周遂命酒一斗獨酌所飲餘者便脫靴洗足主人竊竒之因至京停於賣餽媪肆數日祈覓一館客處媪乃引致於中郎將常何之家媪之初賣餽也李淳風袁天綱嘗遇而異之皆竊云此婦人大貴何以在此馬公尋取

爲妻後有詔文武五品官已上各上封事周陳便宜二十條事遣何奏之乃請置街鼓及文武官緋紫碧綠等服色并城門左右出入事皆合旨太宗怪而問何所見何對曰乃臣家客馬周所爲也召見與語命直門下省仍令房玄齡試經及策拜儒林郎守監察御史以常何舉得其人賜帛百匹周後轉給事中中書舍人有機辯能敷奏深識事端動無不中岑文本見之曰吾見馬君令人忘倦然鳶肩火色騰上必速但恐不能久耳數年

內官至宰相其媪亦爲夫人後爲吏部尚書病消渴彌年不瘳年四十八而卒追贈右僕射高唐公

出定命錄

蘇氏女

蘇某信都富人有女十人爲擇良壻張文成往見焉蘇曰此雖有才不能富貴幸得五品即當死矣魏知古時已及第然未有官蘇云此雖形質黑小然必當貴遂以長女嫁之其女髮長七尺黑光如漆諸妹皆不及有相者云此女當不嚙宿食諸妹笑知古曰只是貧漢得米



命錄

旋煮故無宿飯其後魏爲宰相每食一物已上官供

出定

武后

武士彠之爲利州都督也敕召袁天綱詣京師途經利州士彠使相其妻楊氏天綱曰夫人骨法非常必生貴子遍召其子令相元慶元爽曰可至刺史終亦屯否見韓國夫人曰此女大貴然不利其夫武后時衣男子之服乳母抱於懷中天綱大驚曰此郎君男子神彩奧澈

不易知遂令后試行牀下天綱大驚曰日角龍顏龍睛  
鳳頸伏犧之相貴人之極也更轉側視之又驚曰若是  
女當爲天下主也

出談  
賓錄

### 李淳風

武后之召入宮李淳風奏云後宮有天子氣太宗召宮  
人閱之令百人爲一隊問淳風淳風云在某隊中太宗  
又分爲二隊淳風云在某隊中請陛下自揀擇太宗不  
識欲盡殺之淳風諫不可陛下若畱雖皇祚蹙缺而社

稷延長陛下若殺之當變爲男子即損滅皇族無遺矣

太宗遂止

出定命錄

### 楊貴妃

貴妃楊氏之在蜀也有野人張見之云當大富貴何以在此或問至三品夫人否張云不是一品否曰不是然則皇后耶曰亦不是然貴盛與皇后同見楊國忠云公亦富貴位當秉天下權勢數年後皆如其言

出定命錄

姜皎

僧善相

姜皎之未貴也好弋獵獵還入門見僧姜曰何物道人在此僧云乞飯姜公令取肉食與之僧食訖而去其肉並在姜公使人追問僧云公大富貴姜曰如何得富貴僧曰見真人即富貴矣姜曰何時得見真人僧舉目看曰今日即見真人姜手臂一鷄子直二十千與僧相隨騎馬出城偶逢上皇亦獵時爲臨淄王見鷄子識之曰此是某之鷄子否姜云是因相隨獵俄而失僧所在後有女巫至姜問云汝且看今日有何人來女巫曰今日

天子來姜笑曰天子在宮裏坐豈來看我耶俄有叩門者云三郎來姜出見乃上皇自此倍加恭謹錢馬所須無敢惜者後上皇出潞府百官親舊盡送唯不見姜上皇怪之行至渭北於路側獨見姜公供帳盛相待上皇忻然與別便定君臣之分後姜果富貴

出定命錄

### 常袞

常袞之任福建也有僧某者善占色言事若神袞惜其老命弟子就學其術僧云此事天性非可造次爲傳某

嘗於君左右見一人可教遍招得小吏黃徹馬哀命就  
學老僧遂於闇室中致五色綵於架令自取之曰世人  
皆用眼力不盡但熟看之旬日後依稀認其白者後半  
歲看五色即洞然而得矣命之曰以若闇中之視五綵  
廻之白晝占人因傳其方訣且言後代當無加也李吉  
甫云黃徹之占表許之亞也

出傳  
載

### 劉禹錫

賓客劉禹錫爲屯田員外郎時事稍異旦夕有騰趨之

勢知一僧術數極精寓直日邀之至省方欲問命報韋  
秀才在門公不得已且見令僧坐簾下韋秀才獻卷已  
略省之意氣殊曠韋覺之乃去却與僧語僧不得已呀  
嘆良久乃曰某欲言員外必不愜如何公曰但言之僧  
曰員外後遷乃本行正郎也然須待適來韋秀才知印  
處置公大怒揖出之不旬日貶官韋秀才乃處厚相也  
後二十餘年在中書爲轉屯田郎中

出幽間  
鼓吹

鄭朗

鄭朗相公初舉遇一僧善占色謂曰郎君貴極人臣然無  
進士及第之分若及第則一生厄塞既而狀元及第賀  
客盈門唯此僧不至及重試退黜言者甚衆而此僧獨  
賀曰富貴在裏既而竟如所卜

出據  
言

### 令狐絢門僧

令狐趙公絢在相位馬舉為澤潞小將因奏事到宅會  
公有一門僧善聲色偶窺之謂公曰適有一軍將參見  
相公是何人公以舉名語之僧曰竊視此人他日當與



相公爲方鎮交代公曰此邊方小將縱有軍功不過塞垣一鎮奈何與老夫交代僧曰相公第更召與語貧道爲細看公然之既去僧曰今日看更親切并恐是揚汴公於是稍接之矣咸通九年公鎮維揚舉破龐勛有功先是懿宗面許功成與卿揚州既而難於爽信却除舉淮南行軍司馬公聞之即處分所司排比迎新使羣下皆曰此一行軍耳公乃以其事白之果如所言

出摭言

僧處弘

僧處弘習禪於武當山王建微時販齏於均房間仍行小竊號曰賊王八處弘見而勉之曰子他日位極人臣何不從戎別圖功業而夜遊晝伏沽賊之號乎建感之投忠武軍後建在蜀弘擁門徒入蜀爲構精舍以安之即弘覺禪院也江西鍾傅微時亦以販齏爲事遇上藍和尚教其作賊而尅洪井自是加敬至於軍府大事此

僧皆得參之也

出北夢瑣言

范氏尼

天寶中有范氏尼乃衣冠流也知人休咎魯公顏真卿妻黨之親也魯公尉于醴泉因詣范氏尼問命曰某欲就制科再乞師姨一言范氏曰顏郎事必成自後一兩月必朝拜但半年內慎勿與外國人爭競恐有譴謫公又曰某官階盡得及五品否范笑曰鄰於一品顏郎所望何其卑耶魯公曰官階盡得五品身著緋衣帶銀魚兒子補齋郎某之望滿也范尼指坐上紫絲布食單曰顏郎衫色如此功業名節稱是壽過七十已後不要苦

問魯公再三窮詰范尼曰顏郎聰明過人問事不必到底逾月大酺魯公是日登制科高等授長安尉不數月遷監察御史因押班中有諠譁無度者命吏錄奏次即哥舒翰也翰有新破石堡城之功因泣訴玄宗玄宗坐魯公以輕侮功臣貶蒲州司倉驗其事跡歷歷如見及魯公爲太師奉使於蔡州乃歎曰范師姨之言吾命懸

於賊必矣

出戎幕  
閑談

任之良

任之良應進士舉不第至關東店憇食遇一道士亦從西來同主人歇之良與語問所從來云今合有身名稱意何不却入京任子辭以無資糧到京且無居處道士遂資錢物并與一帖令向肅明觀本院中停之良至京詣觀安置偶見一道士讀經謂良曰太上老君二月十五日生因上表請以玄元皇帝生日燃燈上皇覽表依行仍令中書召試使與一官李林甫拒乃與別敕出身

出定  
命錄

殷九霞

張侍郎某爲河南烏重裔從事同幕皆是名輩有道流  
殷九霞來自青城山有知人之鑒烏公問已年壽官祿  
九霞曰司徒貴任藩服所望者秉持鈞軸封建茅土唯  
在保守庸勲苞貯仁義享福隆厚殊不可涯既而遍問  
賓僚九霞曰其間必有台輔時烏公重一裴副使應聲  
曰裴中丞是宰相否九霞曰若以目前人事言之當如  
尊旨以某所觀却不在此時夏侯相攷爲館驛巡官且

形質低瘁烏因戲曰莫是夏侯巡官對曰司徒所言是矣烏公撫掌而笑曰尊師莫錯否九霞曰某山野之人早修直道無意於名宦金玉蓋以所見任真而道耳烏公曰如此則非某所知也然其次貴達者爲誰曰張支使雖不居廊廟履歷清途亦至榮顯既出遂造張侍郎所居從容謂曰支使神骨清爽氣韻高邁若以紱冕累身止於三二十年居於世俗儻能擺脫囂俗相隨學道即二十年内白日上昇某之此行非有塵慮實亦尋訪

修真之士耳然閱人甚多無如支使者張以其言意浮  
濶但唯唯然將去復來情甚懇至審知張意不迴頗甚  
嗟惜因畱藥數粒并黃紙書一緘而別云藥服之可以  
無疾書紀宦途所得每一遷轉密自啓之書窮之辰當  
自相憶其後譙公顯赫令名再居台鉉張果踐朝列出  
入臺省佩服朱紫廉察數州書載之言靡不詳悉年及  
三紀時爲戶部侍郎紙之所存蓋亦無幾雖名位通顯  
而齒髮衰退每以道流之事話於親知追想其風莫能



及也

出劇  
談錄

相手板庾道敏

宋山陽王休祐屢以言話忤顏有庾道敏者善相手板  
休祐以手板託言他人者庾曰此板乃貴然使人多忤  
休祐以褚淵詳密乃換其手板別白褚於帝前稱下官

帝甚不悅

出酉陽  
雜俎

李參軍

唐李參軍者善相笏知休咎必驗皆呼為李相笏鹽鐵

院官陸遵以笏視之曰評事郎君見到陸遵笑曰是子  
姪否曰是評事郎君陸君曰足下失聲名矣某且無兒  
乃更將出簾下看必有錯陸君甚薄之以爲詐陸君先  
有歌姬在任處其月有姪分婉果男子也

龍復本

開成中有龍復本者無目善聽聲揣骨每言休咎無不  
必中凡有象簡竹笏以手捻之必知官祿年壽宋祁補  
闕有盛名於世縉紳之士無不傾屬屈指翹足期於貴

達時永樂蕭相寘亦居諫署同日詣之授以所持竹笏  
復本執蕭公笏良久置於案上曰宰相笏次至宋補闕  
者曰長官笏宋聞之不樂蕭曰無憑之言安足介意經  
月餘同列於中書候見宰相時李朱崖方秉鈞軸威鎮  
朝野未見間佇立閒談互有諧謔頃之丞相遽出宋以  
手板障面笑未已朱崖目之迴顧左右曰宋補闕笑某  
何事聞之者莫不心寒股慄未旬日出爲清河縣令歲  
餘遂終所任其後蕭公揚歷清途自浙西觀察使入判

戶部非久遂居廊廟俱如復本之言也

出劇談錄

太平廣記卷二百二十四

欽定四庫全書

太平廣記卷二百二十五

伎巧一

因祇國

葛由

魯般

弓人

燕巧人

雲明臺

涇淵浦

新豐

張衡

王肅

凌雲臺

陳思王

吳夫人

區純

水芝歌器

蘭陵王

僧靈昭

七寶鏡臺

因祇國

周成王五年有因祇國去王都九萬里來獻女功一人善工巧體貌輕潔披織羅繡縠之衣長袖脩裾風至則結其衿帶恐飄颻不能自止也其人善織以五色絲內口中引而結之則成文錦其國人又獻雲崑錦文似雲從山嶽中出也有列堞錦文似雲霞覆城雉樓堞也有雜珠錦文似貫珮珠也有篆文錦文似大篆之文也有

列明錦文似羅列燈燭也幅皆廣三尺其國丈夫皆勤於耕稼一日鋤十頃之地又貢嘉禾一莖盈車故時俗

四言詩曰力耕十頃能致嘉穎

出拾遺記

### 葛由

葛由蜀羌人能刻木爲羊賣之一旦乘羊入蜀城蜀之豪貴或隨之上綏山綏山高峻在峨眉之西隨者皆得道不復還故里語曰得綏山一桃雖不能仙亦足以豪

山下多立祠焉

出法苑珠林

魯般

魯般燉煌人莫詳年代巧侷造化於涼州造浮圖作木  
鳶每擊楔三下乘之以歸無何其妻有姓父母詰之妻  
具說其故其父後伺得鳶楔十餘下乘之遂至吳會吳  
人以爲妖遂殺之般又爲木鳶乘之遂獲父屍怨吳人  
殺其父於肅州城南作一木仙人舉手指東南吳地大  
旱三年卜曰般所爲也齋物巨千謝之般爲斷其一手  
其月吳中大雨國初土人尚祈禱其木仙六國時公輸



班亦爲木鳶以窺宋城

出西陽雜俎

### 弓人

宋景公造弓九年乃成而進之弓人歸家三日而卒蓋匠者心力盡於此弓矣後公登獸圈之臺用此弓射之矢越西霸之山彭城之東餘勁中石飲羽焉

出淮南子

### 燕巧人

燕王徵巧術人請以棘之端爲沐母猴母猴成巧人曰人主欲觀之必半歲不入宮不飲酒食肉而霽日出視

之宴陰之間而棘刺之母猴乃可見矣燕王恩養不能

觀也

出藝文類聚

雲明臺

始皇起雲明臺窮四方之珍木搜天下之巧工南得烟丘碧  
樹酈水燃沙賁都朱泥雲岡素竹東得葱巒錦栢縹椽  
龍杉寒河星柘岫山雲梓西得漏海浮金浪淵羽壁滌  
嶂霞桑沈塘員籌北得冥阜乾漆陰坂文梓寒流黑魄  
闔海香瓊珍異是集有二人皆騰虛椽木運斤斧於空

中子時起功至午時已畢秦人皆謂之子午臺也亦言  
於子午之地各起一臺二說有疑

出拾遺記

### 淫淵浦

日南之南有淫泉之浦言其水浸淫從地而出以成淵  
故曰淫泉也或言此泉甘軟男女飲之則淫其水小處  
可濫觴褰涉大處可方舟沿泝隨流屈直其水激石之  
聲似人之歌笑聞者令人淫動故俗謂之淫泉時有鳧  
鴈色如金羣飛戲於沙瀨羅者得之乃真金鳧也昔秦

破驪山之墳行野者見金鳧向南而飛至淫泉寶鼎元年張善爲日南太守郡民有得金鳧以獻太守張善善博識多通考其年月即是秦始皇墓金鳧也昔始皇爲塚斂天下瓌異生殉工人傾遠方竒寶於塚中爲江海川瀆及列山嶽之形以沙棠沉檀爲舟楫金銀爲鳧鴈以琉璃雜寶爲龜魚又於海中作玉象鯨魚銜火珠爲星以代膏燭光出塚間精靈之偉也皆生理巧匠於塚裏又列燈燭如皎日焉先所埋工匠於塚內至被開時

皆不死巧人於塚裏琢石爲龍鳳仙人之像及作碑文辭  
讚漢初發此塚驗諸史傳皆無列仙龍鳳之製則知生  
埋匠者之所作也後人更寫此碑文而辭多怨酷之言  
乃謂怨碑史記略而不錄矣

出拾遺記

### 新豐

高祖既作新豐并移舊社街巷棟宇物色如舊士女老  
幼相攜路首各知其室放夫羊雞鴨於通衢望途亦競  
識其家匠人胡寬所爲也移者皆喜其似而憐之故加

賞贈月餘致累百金

出西京雜記

張衡

後漢張衡字平子造候風地動儀以精銅鑄之圓徑八尺蓋合隆起形如酒罇飾以篆文及山龜鳥獸之狀中有都柱傍行八道施關發機外八龍首各銜銅丸下有蟾蜍張口承之其牙機巧制皆隱在罇中覆蓋周密無際如有地震則罇動機發龍吐丸而蟾蜍銜之震動激揚伺者因此覺知一龍發機而七首不動尋其方面乃

知震動之所在儀之合契若神自書典所記未之有也  
曾一龍發機而地不動京師學者初咸怪其無徵數日  
驛至果地動於是皆服其神妙

出後漢書

### 王肅

王肅造逐鼠丸以銅爲之晝夜自轉

出酉陽雜俎

### 凌雲臺

凌雲臺樓觀極精巧先稱平衆材輕重當宜然後造構  
乃無錙銖相負揭臺雖高峻恒隨風搖動而終無崩殞

魏明帝登臺懼其勢危別以大材扶持之樓即便頽壞  
論者謂輕重力偏故也

出世說

### 陳思王

魏陳思王有神思爲鴨頭杓浮於九曲酒池王意有所  
勸鴨頭則迴向之又爲鵲尾杓柄長而直王意有所到  
處於罇上鏃之鵲則指之

關

### 吳夫人

吳主趙夫人趙達之妹也善畫巧妙無雙能於指間以



彩絲織爲雲龍虬鳳之錦大則盈尺小則方寸宮中謂  
之機絕孫權常嘆魏蜀未夷軍旅之隙思得善畫者使  
圖作山川地勢軍陣之像達乃進其妹權使寫九州江  
湖方嶽之勢夫人曰丹青之色甚易歇滅不可久寶妾  
能刺繡列萬國於方帛之上寫以五嶽河海城邑行陣  
之形乃進於吳主時人謂之針絕雖棘刺木猴雲梯飛  
鳶無過此麗也權居昭陽宮倦暑乃褰紫綃之帷夫人  
曰此不足貴也權使夫人指其意思焉答曰妾欲窮慮

盡思能使下絹帷而清風自入視外無有蔽礙列侍者  
飄然自涼若馭風而行也權稱善夫人乃拊髮以神膠  
續之神膠出鬱夷國接弓弩之斷絃者百斷百續乃織  
爲羅縠累月而成裁之爲幔內外視之飄飄如煙氣輕  
動而房內自涼時權尚在軍旅常以此幔自隨以爲征  
幕舒之則廣縱數丈卷之則可內於枕中時人謂之絲  
絕故吳有三絕四海無儔其妙後有貪寵求媚者言夫  
人多耀於人主因而致退黜雖見疑墜猶存錄其巧工

及吳亡不知所在

出王子  
年拾遺

### 區純

大興中衡陽區純作鼠市四方丈餘開四門門有木人

縱四五鼠於中欲出門木人輒以椎椎之

出晉  
陽秋

### 水芝歌器

西魏文帝造二歌器其一爲二仙人共持一鉢同處一盤蓋有山山有香氣別有一仙人持一金餅以臨器上以水灌山則出於餅而注於器煙氣通發山中謂之仙

人歌器也其一爲二荷同處一盤相去盈尺中有芙蓉下垂器上以水注芙蓉而盈於器又爲鳧鴈蟾蜍以飾之謂之水芝歌器二盤各有一牀一鉢鉢圓而牀方中有人焉言三才之象也器如觥形滿則平溢則傾置之前殿以警滿盈焉

蘭陵王

北齊蘭陵王有巧思爲舞胡子王意欲所勸胡子則捧

盞以揖之人莫知其所由也

出朝野  
僉載

僧靈昭

北齊有沙門靈昭甚有巧思武成帝令於山亭造流杯池船每至帝前引手取杯船即自住上有木小兒撫掌遂與絲竹相應飲訖放杯便有木人刺還上飲若不盡船終不去未幾靈昭忽拊心疑有刀刺須臾吐血而終

七寶鏡臺

胡太后使靈昭造七寶鏡臺合有三十六室別有一婦人手各執鑠纜下一關三十六戶一時自閉若抽此關

諸門咸啓婦人各出戶前

出皇覽

太平廣記卷二百二十五

欽定四庫全書

太平廣記卷二百二十六

伎巧二

水飾圖經

觀文殿

劉交

張崇

十二辰車

銅樽

殷文亮

楊務廉

王琚

薛春惑

馬待封

水飾圖經

煬帝別敕學士杜寶修水飾圖經十五卷新成以三月  
上巳日會羣臣於曲水以觀水飾有神龜負八卦出河  
授伏羲黃龍負圖出河玄龜銜符出洛水鱸魚銜籙圖  
出翠嬀之水並授黃帝黃帝齋於玄扈鳳鳥降於洛上  
丹甲靈龜銜書出洛授蒼頡堯與舜坐舟於河鳳凰負  
圖赤龍載圖出河並授堯龍馬銜甲文出河授舜堯與  
舜遊河值五老人堯見四子於汾水之陽舜漁於雷澤  
陶於河濱黃龍負黃符璽圖出河授舜舜與百工相和



而歌魚躍於水白而長人面魚身捧河圖授禹舞而入  
河禹治水應龍以尾畫地導決水之所出鑿龍門疏河  
禹過江黃龍負舟玄夷蒼水使者授禹山海經遇兩神  
女於泉上帝天乙觀洛黃魚雙躍化爲黑玉赤文姜嫄  
於河濱履巨人之跡棄后稷於寒冰之上鳥以翼薦而  
覆之王坐靈沼於勃魚躍太子發度河赤文白魚躍入  
王舟武王渡孟津操黃鉞以麾陽侯之波成王舉舜禮  
榮光幕河穆天子奏鈞天樂於玄池獵於淖津獲玄貉

白狐觴西王母於瑤池之上過九江龜龜爲梁塗脩國  
獻昭王青鳳丹鵠飲於浴溪王子晉吹笙于伊水鳳凰  
降秦始皇入海見海神漢高祖隱芒碭山澤上有紫雲  
武帝泛樓船於汾河遊昆明池去大魚之鉤遊洛水神  
上明珠及龍髓漢桓帝遊河值青牛自河而出曹瞞浴  
譙水擊水蛟魏文帝興師臨河不濟杜預造河橋成晉  
武帝臨會舉酒勸預五馬浮渡江一馬化爲龍仙人酌  
醴泉之水金人乘金船蒼文玄龜銜書出洛青龍負書

出河並進於周公呂望釣磻溪得玉璜文釣卞溪獲大  
鯉魚腹中得兵鈴齊桓公問愚公名楚王渡江得萍實  
秦昭王宴於河曲金人捧水心劍造之吳大帝臨釣臺  
望葛玄劉備乘馬渡檀溪澹臺子羽過江兩龍夾舟溜  
丘訢與水神戰周處斬蛟屈原遇漁父卞隨投潁水許  
由洗耳趙簡子值津吏女孔子值河浴女子秋胡妻赴  
水孔愉放龜莊惠觀魚鄭弘樵徑還風趙炳張蓋過江  
陽谷女子浴日屈原沉汨羅水巨靈開山長鯨吞舟若

此等總七十二勢皆刻木爲之或乘舟或乘山或乘平洲或乘磐石或乘宮殿木人長二尺許衣以綺羅裝以金碧及作雜禽獸魚鳥皆能運動如生隨曲水而行又間以妓航與水飾相次亦作十二航航長一丈闊六尺木人奏音聲擊磬撞鐘彈箏鼓瑟皆得成曲及爲百戲跳劍舞輪昇竿擲繩皆如生無異其妓航水飾亦雕裝奇妙周旋曲池同以水機使之奇幻之異出於意表又作小舸子長八尺七艘木人長二尺許乘此船以行酒

每一船一人擎酒盃立於船頭一人捧酒鉢次立一人撐船在船後二人盪漿在中央遶曲水池迴曲之處各坐侍宴賓客其行酒船隨岸而行行疾於水飾水飾行遶池一匝酒船得三遍乃得同止酒船每到坐客之處即停住擎酒木人於船頭伸手遇酒客取酒飲訖還盃木人受盃迴身向酒鉢之人取杓斟酒滿盃船依式自行每到坐客處例皆如前法此並約岸水中安機如斯之妙皆出自黃衷之思寶時奉敕撰水飾圖經及檢校

良工圖畫既成奏進敕遣寶共黃袞相知於苑內造此  
水飾故得委悉見之袞之巧性今古罕儔

出大業拾遺

### 觀文殿

隋煬帝令造觀文殿前兩廂爲書堂各十二間堂前通  
爲閣道承殿每一間十二寶厨前設方五香重牀亦裝  
以金玉春夏鋪九曲象簾秋設鳳綾花褥冬則加綿裝  
須彌氈帝幸書堂或觀書其十二間內南北通爲閃電  
牕零籠相望雕刻之工窮竒極之妙金鋪玉題綺井華

棖輝映溢目每三間開一方戶戶垂錦幔上有二飛仙  
當戶地口施機輦駕將至則有宮人擎香爐在輦前行  
去戶一丈脚踐機發仙人乃下閣捧幔而昇閣扇即開  
書厨亦啓若自然皆一機之力輦駕出垂閉復常諸房  
入戶式樣如一其所撰之書屬辭比事條貫有序文略  
理暢互相明發及抄寫真正文字之間無點竄之誤裝  
翦華淨可謂冠絕今古曠世之名寶自漢已來訖乎梁  
文人才子諸所撰著無能及者其新書之名多是帝自

製每進一書必加賞賜

出大業拾遺

劉文

幽州人劉文戴長竿高七十尺自擎上下有女十二甚端正於竿置定跨盤獨立見者不忍女無懼色後竟還

撲殺

出朝野僉載

張崇

唐巧人張崇者能作灰畫腰帶鉸具每一跨大如錢灰畫燒之見火即隱起作龍魚鳥獸之形莫不悉備

出朝野僉



載

十二辰車

則天如意中海州進一匠造十二辰車迴轅正南則午  
門開馬頭人出四方迴轉不爽毫釐又作木火通鐵盞

盛火輶轉不翻

出朝野  
僉載

銅樽

韓王元嘉有一銅罇背上貯酒而一足倚滿則正立不  
滿則傾又爲銅鳩壘上摩之熱則鳴如真鳩之聲

出朝  
野僉

載

殷文亮

洛州殷文亮曾爲縣令性巧好酒刻木爲人衣以繒綵  
酌酒行觴皆有次第又作妓女唱歌吹笙皆能應節飲  
不盡即木小兒不肯把飲未竟則木妓女歌管連催此  
亦莫測其神妙也

出朝野  
僉載

楊務廉

將作大匠楊務廉甚有巧思常於沁州市內刻木作僧

手執一椀自能行乞椀中錢滿關鍵忽發自然作聲云  
布施市人競觀欲其作聲施省日盈數千矣

出朝野  
僉載

### 王琚

郴州刺史王琚刻木為獺沉於水中取魚引首而出蓋  
獺口中安餌為轉關以石縋之則沉魚取其餌關即發

口合則銜魚石發則浮出

出朝野  
僉載

### 薛春惑

薛春惑者善投壺龍躍隼飛矯無遺箭置壺於背後却

反矢以投之百發百中

出朝野  
僉載

### 馬待封

開元初修法駕東海馬待封能窮伎巧於是指南車記  
里鼓相風鳥等待封皆改修其巧踰於古待封又爲皇  
后造粧具中立鏡臺臺下兩層皆有門戶后將櫛沐啓  
鏡奩後臺下開門有木婦人手執巾櫛至后取已木人  
即還至於面脂粧粉眉黛髻花應所用物皆木人執繼  
至取畢即還門戶復閉如是供給皆木人后既粧罷諸

門皆闔乃持去其粧臺金銀彩畫木婦人衣服裝飾窮極精妙焉待封既造鹵簿又爲帝后造粧臺如是數年敕但給其用竟不拜官待封恥之又奏請造歌器酒山撲滿等物許之皆以白銀造作其酒山撲滿中機關運動或四面開定以納風氣風氣轉動有陰陽向背則使其外泉流吐納以挹盃斝酒使出入皆若自然巧踰造化矣既成奏之即屬宮中有事竟不召見待封恨其數竒於是變姓名隱於西河山中至開元末待封從晉州

來自稱道者吳賜也常絕粒與崔邑令李勁造酒山撲  
滿歌器等酒山立於盤中其盤徑四尺五寸下有龜  
承盤機運皆在龜腹內盤中立山山高三尺峰巒殊妙

盤以木爲之布漆其外龜及山皆漆  
布脫空彩畫其外山中虛受酒三斗繞山皆列酒池池

外復有山圍之池中盡生荷花及葉皆鍛鐵爲之花開  
葉舒以代盤楪設脯醢珍果佐酒之物於花葉中山南  
半腹有龍藏半身於山開口吐酒龍下大荷葉中有盃  
承之盃受四合龍吐酒八分而止當飲者即取之飲酒

若遲山頂有重閣閣門即開有催酒人具衣冠執板而出於是歸盞於紫龍復注之酒使乃還閣門即閉如復遲者使出如初直至終宴終無差失山四面東西皆有龍吐酒雖覆酒於池池內有穴潛引池中酒納於山中比席闌終飲池中酒亦無遺矣歌器二在酒山左右龍注酒其中虛則歌中則平滿則覆則魯廟所謂侑坐之器也君子以誠盈滿孔子觀之以誠焉杜預造歌器不成前史所載若吳賜也造之如常器耳

出紀  
聞

太平廣記卷二百二十六



欽定四庫全書

太平廣記卷二百二十七

伎巧三

華清池

重明枕

韓志和

絕藝

督君謨

李欽瑤

蘇州游僧

江西人

僧靈鑒

張芬

河北將軍

西蜀客

陟岵寺僧

伎巧

華清池

玄宗於華清宮新廣一池制度宏麗安祿山於范陽以  
白玉石爲魚龍鳳鴈仍爲石梁及石蓮花獻雕鐫巧妙  
殆非人工上大悅命於池中仍以石梁橫亘其上而下  
蓮花出於水際上因幸華清宮至其所解衣將入而魚  
龍鳳鴈皆若奮鱗舉翼狀欲飛動上甚恐遽命撤去去  
之而蓮花石梁尚存又嘗於宮中置長湯池數十間屋

宇環迴甃以文石為銀鏤漆船及檀香水船致於其中  
至檝棹皆飾以珠玉又於湯池中壘瑟瑟及檀香木為

山狀瀛洲方丈

出談  
賓錄

### 重明枕

元和八年大軫國貢重明枕神錦衾云其國在海東南

三萬里當軫宿之位故曰大軫國合丘禺藁山

合丘禺  
藁山見

山海  
經

重明枕長一尺二寸高六寸潔白逾於水精中

有樓臺之狀四方有十道士持香執簡循環無已謂

之行道真人其樓臺瓦木丹青真人簪帔無不悉具  
通瑩焉如水觀物神錦衾水蠶絲所織方二尺厚一  
寸其上龍文鳳彩殆非人工其國以五色石甃池塘  
採大柘葉飼蠶於池中始生如蚊睫游泳其間及長  
可五六寸池中有挺荷雖驚風疾吹不能動大者可濶  
三四尺而蠶經十五日即跳入荷中以成其繭形如  
方斗自然五色國人繅之以織神錦亦謂之靈泉絲  
上始覽錦衾與嬪御大笑曰此不足以爲嬰兒綳褌

曷能為我被耶使者曰此錦之絲水蠶也得水即舒  
水火相反遇火則縮遂於上前令四官張之以水一  
噴即方二丈五色煥爛逾於向時上歎曰本乎天者  
親上本乎地者親下不亦然哉却令以火逼之須臾

如故

出杜  
陽編

### 韓志和

穆宗朝有飛龍士韓志和本倭國人也善雕木作鸞鶴  
鴉鵲之狀飲啄悲鳴與真無異以關揆置於腹內發之

則凌空奮翼可高百尺至一二百步外方始却下兼刻木猫兒以捕雀鼠飛龍使異其機巧奏之上觀而悅之志和更雕踏牀高數尺其上飾之以金銀綵繪謂之見龍牀置之則不見龍形踏之則鱗鬣爪角俱出始進上以足履之而龍夭矯若得雲雨上恐懼遂令撤去志和伏於上前稱臣愚昧而致有驚忤聖躬臣願別進薄伎以娛陛下耳目以贖死罪上笑曰所解何伎試為我出志和於懷中將出一桐木合方數寸其中有物名蠅虎

子數不啻一二百焉其形皆赤云以丹砂嚼之故也乃  
分爲五隊令舞梁州上召國樂以舉其曲而虎子盤迴  
宛轉無不中節每遇致詞處則隱隱如蠅聲及曲終累  
累而退若有尊卑等級志和臂虎子於指上獵蠅於數  
步之內如鷓擒雀罕有不獲者上嘉其伎小有可觀即  
賜以雜彩銀器而志和出宮門悉轉施於人不逾年竟  
不知志和所在上於殿前種千葉牡丹及花始開香氣  
襲人一朶千葉大而且紅上每覩芳盛歎人間未有自

是宮中每夜即有黃白蝴蝶萬數飛集於花間輝光照耀達曙方去宮人競以羅巾撲之無有不獲者上令張網於宮中遂得數百於殿內縱嬪御追捉以爲娛樂遲明視之則皆金玉也其狀工巧無以爲比而內人爭用絲縷絆其脚以爲首飾夜則光起於粧奩中其後開寶厨視金屑玉屑藏內將有化爲蝶者宮中方覺焉

出杜陽編

### 絕藝

督君謨



隋末有督君謨善閉目而射志其目則中目志其口則中口有王靈智者學射於君謨以爲曲盡其妙欲射殺君謨獨擅其美君謨製一短刀箭來輒截之惟有一矢君謨張口承之遂嚙其鏑而笑曰汝學射三年未教汝嚙鏑法列子甘蠅古之善射者弟子名飛衛巧過於師紀昌又學射於飛衛以徼角之弧朔蓬之籥射貫虱心既盡飛衛之術計天下敵已一人而已乃謀殺飛衛相遇於野二人交射矢鋒相觸墜地而塵下揚飛衛之矢

先窮紀遺一矢既發飛衛以棘刺之端捍之而無差焉  
於是二子泣而投弓請爲父子刻背爲誓不得告術於  
人孟子曰逢蒙學射於羿盡羿之道惟羿爲愈已於是

殺羿

出酉陽  
雜俎

### 李欽瑤

天寶末有騎將李欽瑤者弓矢絕倫以勞累官至郡守  
兼御史大夫至德中隸臨淮與史思明相持於陝西晨  
朝合戰臨淮布陣徐進去敵尚十許里忽有一狐起於

軍前踉蹌而趨若導引者臨淮不懌曰越王軾怒蛙蓋  
激勵官軍士耳狐乃持疑妖邪之物豈有前陣哉即付  
欽瑤以三矢令取狐焉欽瑤受命而馳適有淺蕪三二  
十畝狐奔入其中欽瑤逐之歛有野雉驚起馬足徑入  
雲霄欽瑤翻身仰射一發而墜然後鳴鞭逐狐十步之  
內拾矢又中於是攜二物以復命馬舉軍懽呼聲振山  
谷時回鶻列騎置陣於北原其首領僅一二百輩棄軍  
飛馬而來爭捧欽瑤以爲神異仍謂曰爾非回鶻之甥

不然何能弧矢之妙乃得如此哉

出集  
異記

蘇州游僧

蘇州重玄寺閣一角忽墊計其扶薦之功當用錢數千  
貫有游僧曰不足勞人請得一夫斫木爲楔可以正之  
寺主從焉游僧每食訖輒取楔數十執柯登閣敲椽其  
間未旬日閣柱悉正舊說聖善寺閣常貯醋十瓮恐爲

蛟龍所伏以致雷電

出國  
史補

江西人

江西人有善展竹數節可成器又有人熊葫蘆云翻葫

蘆易於翻鞠

出酉陽雜俎

### 僧靈鑿

貞元末閬州僧靈鑿善彈常自為彈丸其彈丸方用洞庭沙岸下土三斤炭末三兩資末一兩榆皮半兩泔澱二勺紫礪二兩細沙三分藤紙五張渴易汁半合丸味和搗三千杵齊丸之陰乾鄭彙為刺史時有當家名寅讀書善飲酒彙甚重之寅常與靈鑿較角放彈寅指一

樹節相去數十步曰中之獲五千寅自一發而中之彈  
九反射而不破靈鑿控弦百發百中皆節陷而九碎焉

出酉陽  
雜俎

張芬

張芬曾爲韋臯行軍曲藝過人力舉七尺碑定雙輪水  
磴常於福感寺趨鞠高及半塔彈弓力五斗常揀向陽  
巨筍織竹籠之隨長旋培常畱寸許度竹籠高四尺然  
後放長秋深方去籠伐之一尺十節其色如金用成弓

馬每塗牆方丈彈成天下太平字字體端妍如人摸成

出酉陽

雜俎

### 河北將軍

建中初有河北將軍姓夏彎弓數百斤常於毬場中累錢千餘走馬以擊鞠杖擊之一擊一錢飛起高六七丈其妙如此又於新泥牆安棘刺數十取爛豆相去一丈擲豆貫於刺上百不差一又能走馬書一紙

出酉陽  
雜俎

### 西蜀客

又張芬在韋臯幕中有一客於宴席上以籌椀中綠豆擊蠅十不失一一座驚笑芬曰無費吾豆遂拈起蠅拈

其後脚略無脫者

出酉陽雜俎

### 陟屺寺僧

荊州陟屺寺僧那善照射每言照射之法凡光長而搖者鹿貼地而明滅者兔低而不動者虎又言夜格虎時必見三虎並來挾者虎威當刺其中者虎死威乃入地得之可却百邪虎初死記其頭所藉處候月黑夜掘之



欲掘時必有虎來吼擲前後不足畏此虎之鬼也深二尺當得物如琥珀蓋虎目光淪入地所爲也

出酉陽雜俎

太平廣記卷二百二十七

欽定四庫全書

太平廣記卷二百二十八

博戲

奕棊

羊玄保

王積薪

一行

韋延祐

日本王子

彈棊

漢成帝

魏文帝

藏鈎

桓玄

高映

石旻

雜戲

奕棊

羊玄保

宋文帝善奕棊常與太平羊玄保棊玄保戲賭得宣城

太守當敕除以爲虛受

出談  
藪

王積薪

玄宗南狩百司奔赴行在翰林善碁者王積薪從馬蜀道隘狹每行旅止息道中之郵亭人舍多爲尊官有力之所先積薪棲無所入因沿溪深遠寓宿於山中孤姥之家但有婦姑皆闔戶止給水火纔暝婦姑皆闔戶而休積薪棲于簷下夜闌不寢忽聞堂內姑謂婦曰良宵無以適興與子圍碁一賭可乎婦曰諾積薪私心竒之堂內素無燈燭又婦姑各在東西室積薪乃附耳門扉俄聞婦曰起東五南九置子矣姑應曰東五南十二置

子矣婦又曰起西八南十置子矣姑又應曰西九南十  
置子矣每置一子皆良久思唯夜將盡四更積薪一一  
密記其下止三十六忽聞姑曰子已敗矣吾止勝九枰  
耳婦亦甘焉積薪遲明具衣冠請問孤姥曰爾可率已  
之意而按局置子焉積薪即出囊中局盡平生之祕妙  
而布子未及十數孤姥顧謂婦曰是子可教以常勢耳  
婦乃指示攻守殺奪救應防拒之法其意甚略積薪即  
更求其說孤姥笑曰止此亦無敵於人間矣積薪虔謝

而別行十數步再詣則失向來之室閭矣自是積薪之  
藝絕無其倫即布所記婦姑對敵之勢罄竭心力較其  
九枰之勝終不得也因名鄧艾開蜀勢至今碁圖有焉  
而世人終莫得而解矣

出集  
異記

### 一行

一行本不解奕碁因會燕公宅觀王積薪碁一局遂與  
之敵笑謂燕公曰此但爭先耳若念貧道四句乘除語  
則人人爲國手晉羅什與人碁拾敵死子空處如龍鳳

形或言王積薪對玄宗碁局畢悉持出

出酉陽雜俎

韋延祐

韋延祐圍碁與李士秀敵手士秀惜其名不肯先寧輸延祐籌終饒兩路延祐本應明經舉道過大梁其護戎知其善碁表進之遂因言江淮足碁人就中奕碁明經

者多解

出嘉話錄

日本王子

大中中日本國王子來朝獻寶器音樂上設百戲珍饌



以禮焉王子善圍碁上敕待詔顏師言對手王子出楸  
玉碁局冷暖玉碁子云本國之東三萬里有集真島島  
上有凝霞臺臺上有手譚池池中出王子不由制度自  
然黑白分明冬溫夏冷故謂之冷暖玉更產如楸玉狀  
類楸木琢之爲碁局光潔可鑑及師言與之敵手至三  
十三下勝負未決師言懼辱君命而汗手凝思方敢落  
指卽謂之鎮神頭乃是解兩征勢也王子瞪目縮臂已  
伏不勝迴話鴻臚曰待詔第幾手耶鴻臚詭對曰第三

手也師言實稱國手王子曰願見第一曰王子勝第三  
方得見第二勝第二方得見第一今欲躁見第一其可得  
乎王子掩局而吁曰小國之第一不如大國之第三信  
矣今好事者尚有顏師言三十三下鎮神頭圖

出杜  
陽編

### 彈碁

#### 漢成帝

漢成帝好蹙鞠羣臣以蹙鞠勞體非尊者所宜帝曰朕  
好之可擇似而不勞者奏之劉向奏彈碁以獻上悅賜

之青羔裘紫絲履服以朝覲

出小說

### 魏文帝

彈碁魏宮內用裝碁戲也文帝爲之特妙用手巾角拂之無不中者有客自云能帝使爲之客著葛巾角低頭

拂碁妙殆踰於帝

出世說

又文帝嘗云予於他戲弄之事少所喜唯彈碁略盡其妙少時嘗爲之賦昔京師妙工有二馬合卿侯東方世安張公子常恨不得與之對也今彈碁用碁二十四色

色別貴賤又魏戲法先立一碁於局中餘者間白黑圓  
繞之十八籌成都

出世說

### 藏鈎

舊言藏鈎起於鈎弋蓋依辛氏三秦記云漢武鈎弋夫  
人手拳時人傲之目爲藏鈎也殷敬順敬訓曰彊與摠  
同衆人分曹手藏物探取之又令藏鈎剩一人則來往  
於兩朋謂之誡鴟風土記曰藏鈎之戲分二曹以較勝  
負若人偶則敵對若奇則使一人爲游附或屬上曹或

屬下曹爲飛鳥又今爲此戲必於正月據風土記在臘祭後也庾闡藏鈎賦云予以臘後命中外以行鈎爲戲

矣

出酉陽雜俎

### 桓玄

殷仲堪與桓玄共藏鈎一朋百壽桓朋欲不勝唯餘虎探在顧愷之爲殷仲堪叅軍屬病疾在解桓遣信請顧起病令射取虎探即來坐定語顧云君可取鈎顧答云賞百匹布顧即取得鈎桓朋遂勝

出渚宮故事

高映

舊說藏彊令人生離或言占語有徵也舉人高映善意  
彊段成式常於荊州藏鈎每曹五十餘人十中其九同  
曹鈎亦知其處當時疑有他術訪之映言但意舉止辭

色若察囚視盜也

出酉陽  
雜俎

石旻

山人石旻尤妙打彊與張又新兄弟善暇夜會客因試  
其意彊注之必中張遂寘鈎於巾篋中旻良久笑曰盡

張空拳有頃眼鈎在張君幘頭左翅中其妙如此旻後居揚州段成式因識之曾祈其術石謂成式可先畫人首數十遣胡越異貌辯其相當授疑其見給竟不及畫

出酉陽  
雜俎

### 雜戲

武帝時郭舍人善投壺以竹爲矢不用棘也古之投壺取中而不求還故實小豆於中惡其矢躍而出也郭舍人則激矢令還一矢百餘反謂之爲驍言如博之羿棊

於輩中爲驍傑也每爲武帝投壺輒賜金帛

出西京雜記

小戲中於耍局一枰各布五子角遲速名蹙融段成式

讀座右方爲之感戎

出酉陽雜俎

貞元中董叔儒進博局并經一卷頗有新意不行於時  
洛陽令崔師本又好爲古文擣搯其法三分其子三百  
六十限以二關人執六馬其骰五枚分上爲黑下爲白  
黑者刻二爲犢白者刻二爲雉擲之全黑乃爲盧其彩  
十六二雉三黑爲雉其彩十四二犢三白爲犢其彩十



全白爲白其彩八四者貴彩也開爲十二塞爲十一塔

爲五禿爲四梟爲二擲爲三

二六者雜彩也

貴彩得連擲得打

馬得過關餘彩則否新加進六兩彩

出國史補

貞元中有杜勸好長行皆有佳名各記有輕妙夏中用

者爲冷子取其似蕉葛之輕健而名之

出嘉話錄

今之博戲有長行最盛其具有局有子子黑黃各十五  
擲采之骰有二其法生於握槊變於雙六天后嘗夢雙  
六不勝狄梁公言宮中無子是也後人新意長行出焉

又有小雙六圍透大點小點遊談鳳翼之名然無如長  
行也監險易者喻時事焉適變通者方易象焉王公大人  
頗或耽翫至於廢慶弔忘寢食及博徒用之於是疆各  
爭勝謂之撩零假借分畫謂之囊家囊家什一而取謂  
之乞頭有通宵而戰者有破產而輸者其工者近有譚  
鎬崔師本首出圍棊次於長行其工者近有韋延祐楊  
芄首出如彈棊之戲甚古法雖設鮮有爲之其工者近  
有吉達高越首出焉

出國  
史補



太平廣記卷二百二十八

欽定四庫全書

太平廣記卷二百二十九

器玩一

周穆王

周靈王

王子喬

方丈山

崑吾山

漢太上皇

漢武帝

輕玉磬

李夫人

吉光裘

西毒國

桂宮

西胡渠王

漢宣帝

劉表

周穆王

周穆王時西戎獻玉杯光照一室置杯于中庭明日水  
滿杯香而甘美斯仙人之器也

出十  
洲記

周靈王

周靈王二十三年起昆陽臺渠胥國來獻玉駱駝高五  
尺琥珀鳳凰高六尺火齊鏡高三尺暗中視物如畫向  
鏡則聞影應聲周人見之如神靈王末不知所之

出王  
子年

拾遺

王子喬

王子喬墓在京陵戰國時有人盜發之都無見惟有一劍懸在壙中欲取而劍作龍虎之聲遂不敢近俄而徑飛上天神仙經云真人去世多以劍代五百年後劍亦能靈化此其驗也

出世說

方丈山

方丈山一名巒稚東有龍塲千里玉瑤爲林龍常鬪此處膏血如流水膏色黑者著地堅凝如漆而有紫光可

爲寶器

出王子年拾遺記

### 昆吾山

昆吾山其下多赤金色如火昔黃帝伐蚩尤陳兵於此地掘深百丈猶未及泉惟見火光如星地中多丹鍊石爲銅銅色青而利泉色赤山草木皆勁利土亦剛而精至越王句踐使工人以白牛馬祠昆吾之神採金鑄之以成八劍一名掩日以之指日則光晝暗金陰物也陰盛則陽滅二名斷水以之畫水開而卽不合三名轉魄



以之指月則蟾兔為之側轉四名懸翦飛鳥遊蟲遇觸  
其刃如斬截焉五名驚鯢以之泛海則鯨鯢為之深入  
六名滅魂挾之夜行不逢魍魅七名却邪有妖魅者見  
之則止八名真剛以之切玉斷金如刻削土木矣以應  
八方之氣鑄之者

王子年  
拾遺記

### 漢太上皇

漢太上皇徵時常佩一刀長三尺上有銘其字雖難識  
疑是殷高宗伐鬼方時作此物也太上皇遊豐沛山澤

中窮谷裏有人歐冶鑄上皇息其傍問曰此鑄何器工人笑而答曰為天子鑄劍勿泄言上皇謂為戲言了無疑色工曰今所鑄鐵鋼礪難成若得翁腰間佩刀雜而冶之即成神器可以尅定天下星精為輔佐以殲三猾水衰火盛此為異兆也上皇曰余有此物名為匕首其利難儔水斷虬龍陸斬虎兕魑魅魍魎莫能逢之削玉鑄金其刃不卷工人曰若不得此匕首以和鑄雖歐冶專精越工砥鐔終為鄙器上皇即解腰間匕首以投於

鑪中俄而焜焜衝天日為之晝闇及乎劍成殺三牲釁  
祭之鑄工問上皇何時得此七首曰秦昭襄王之時余  
行逢一野人於路授余云殷時靈物世世相傳上有古  
書記其年月及劍成工人視之其銘尚存叶前疑也工  
人卽持劍授上皇上皇以賜高祖高祖長佩於身以殲  
三猾及天下已定授呂后藏於寶庫之中守藏者見白  
氣如雲出於戶外如龍蛇改其庫名曰靈金藏及諸呂  
擅權白氣亦滅及惠帝卽位以此庫貯禁兵器改曰靈

金內府

出王子年拾遺記

又漢帝相傳以秦王子嬰所奉白玉璽高祖斬白蛇劍劍上皆用七綵珠九華玉以為飾雜廁五色琉璃為劍匣劍在室中其光景猶照於外與挺劍不殊十二年一加磨礮刃上常若霜雪開匣板鞘輒有風氣光彩射人

出酉陽雜俎

### 漢武帝

孫氏應瑞圖六神鼎者文質精也知吉凶知存亡能輕

能重能息能行不灼自沸不汲自滿中生五味王者興  
則出衰則去說苑云孝武時汾陰人得寶鼎獻之甘泉  
宮羣臣畢賀上壽曰陛下得周鼎侍中吾丘壽王曰非  
周鼎上召問之有說則生無說則死壽王對曰周德者  
始於天授成於文武顯於周公德澤上暢於天下漏三  
泉上天報應鼎為周出今漢繼周德澤顯行六合和同  
至陛下之身而逾盛天瑞並至昔秦始皇親求鼎於彭  
城而不得天昭有德神寶自至此天所以遺漢乃漢鼎

非周鼎也上曰善魏文帝典論亦云墨子曰昔夏后啓使飛廉折金以精神於昆吾使翁乙灼自若之龜鼎成四定而方不灼自烹不舉自滅不遷自行拾遺錄云周末大亂九鼎飛入天池末世書論云入泗水聲轉謬焉

出小  
說

### 輕玉磬

漢武帝起招仙閣於甘泉宮西其上懸浮金輕玉之磬浮金者自浮水上輕玉者其質貞明而輕也

出洞  
冥記

李夫人

漢武帝過李夫人就取玉簪搔頭自此宮人搔頭皆用

玉簪玉倍貴焉又以象牙為篋賜李夫人

出小說小

吉光裘

漢王莽時西戎獻吉光裘入水數日不濡入火不焦元

鳳不道之時服此裘以視朝焉

出十洲記

西毒國

漢武帝時西毒國獻連環羈皆以白玉作之瑪瑙石為

勒白光琉璃為鞍安在暗室中嘗照十餘丈其光如晝

西京  
雜記

桂宮

漢武帝為七寶牀雜寶案雜寶屏風雜寶帳設於桂宮

時人謂之四寶宮

出西京  
雜記

西胡渠王

漢武帝塚裏先有玉箱瑤杖各一是西胡渠王所獻帝  
平素常玩之後有人扶風郿市買得二物帝左右識而



認之說賣者形狀乃帝也

出異苑

### 漢宣帝

漢綵女常以七月七日夜穿七孔針於開襟樓俱以習之  
宣帝被收繫郡邸獄臂上猶帶史良娣合采婉轉絲繩  
係身毒國寶鏡一枚大如八銖錢舊傳此鏡照見妖魅  
得佩之者為天神所福故宣帝從危獲濟及卽大位每  
持此鏡感咽移辰常以琥珀筭盛之緘以戚里織成一  
曰斜紋織成宣帝崩不知所在

出西京雜記

劉表

劉表跨有南土子弟驕貴並好酒為三爵大曰伯雅受  
七升次曰仲雅受六升次曰季雅受五升

出魏文  
典論

太平廣記卷二百二十九

欽定四庫全書

太平廣記卷二百三十

器玩二

蘇威

王度

蘇威

隋僕射蘇威有鏡殊精好日月蝕既鏡亦昏黑無所見威以左右所污不以為意他日月蝕半缺其鏡亦半昏如之於是始寶藏之後櫃中有聲如雷尋之乃鏡聲無

何而子夔死後又有聲而威敗其後不知所在

出傳記

### 王度

隋汾陰侯生天下奇士也王度常以師禮事之臨終贈度以古鏡曰持此則百邪遠人度受而寶之鏡橫徑八寸鼻作麒麟蹲伏之象透鼻列四方龜龍鳳虎依方陳布四方外又設八卦卦外置十二辰位而具畜焉辰畜之外又置二十四字周遶輪廓文體似隸點畫無缺而非字書所有也侯生云二十四氣之象形承日照之則

背上文畫墨入影內纖毫無失舉而扣之清音徐引竟  
日方絕嗟乎此則非凡鏡之所同也宜其見賞高賢自  
稱靈物侯生常云昔者吾聞黃帝鑄十五鏡其第一橫  
徑一尺五寸法滿月之數也以其相差各按一寸此第  
八鏡也雖歲祀攸遠圖書寂寞而高人所述不可誣矣  
昔楊氏納環累代延慶張公喪劍其身亦終今度遭世  
擾攘居常鬱怏王室如燬生涯何地寶鏡復去哀哉今  
具其異跡列之於書後世數千載之下倘有得者知其

所由耳大業七年五月度自御史罷歸河東適遇侯生  
卒而得此鏡至其年六月度歸長安至長樂坡宿於主  
人程雄家雄新受寄一婢頗甚端麗名曰鸚鵡度既稅  
駕將整冠履引鏡自照鸚鵡遙見即便叩首流血云不  
敢住度因召主人問其故雄云兩月前有一客攜此婢  
從東來時婢病甚客便寄留云還日當取比不復來不  
知其婢由也度疑精魅引鏡逼之便云乞命即變形度  
即掩鏡曰汝先自叙然後變形當捨汝命婢再拜自陳

云某是華山府君廟前長松下千歲老狸大行變惑罪  
合至死遂為府君捕逐逃於河渭之間為下邳陳思恭  
義女蒙養甚厚嫁鸚鵡與同鄉人柴華鸚鵡與華意不  
相愜逃而東出韓城縣為行人李无傲所執无傲羸暴  
丈夫也遂將鸚鵡遊行數歲昨隨至此忽爾見留不意  
遭逢天鏡隱形無路度又謂曰汝本老狐變形為人豈  
不害人也婢曰變形事人非有害也但逃匿幻惑神道  
所惡自當至死耳度又謂曰欲捨汝可乎鸚鵡曰辱公

厚賜豈敢忘德然天鏡一照不可逃形但久為人形羞  
復故體願緘於匣許盡醉而終度又謂曰緘鏡於匣汝  
不逃乎鸚鵡笑曰公適有美言尚許相捨緘鏡而走豈  
不終恩但天鏡一臨竄跡無路惟希數刻之命以盡一  
生之歡耳度登時為匣鏡又為致酒悉召雄家鄰里與  
宴謔婢頃大醉奮衣起舞而歌曰寶鏡寶鏡哀哉予命  
自我離形于今幾姓生雖可樂死必不傷何為眷戀守  
此一方歌訖再拜化為老狸而死一座驚歎大業八年



四月一日太陽虧度時在臺直晝卧廳閣覺日漸昏諸  
吏告度以日蝕甚整衣時引鏡出自覺鏡亦昏昧無復  
光色度以寶鏡之作合於陰陽光景之妙不然豈合以  
太陽失曜而寶鏡亦無光乎歎怪未已俄而光彩出日  
亦漸明比及日復鏡亦精朗如故自此之後每日月薄  
蝕鏡亦昏昧其年八月十五日友人薛俠者獲一銅劍  
長四尺劍連於靶靶盤龍鳳之狀左文如火焰右文如  
水波光彩灼爍非常物也俠持過度曰此劍俠常試之

每月十五日天地清朗置之暗室自然有光傍照數丈  
俠持之有日月矣明公好奇愛古如飢如渴願與君今  
夕一試度喜甚其夜果遇天地清霽密閉一室無復脫  
隙與俠同宿度亦出寶鏡置于座側俄而鏡上吐光明  
照一室相視如畫劍橫其側無復光彩俠大驚曰請內  
鏡於匣度從其言然後劍乃吐光不過一二尺耳俠撫  
劍歎曰天下神物亦有相伏之理也是後每至月望則  
出鏡於暗室光嘗照數丈若月影入室則無光也豈太

陽太陰之耀不可敵也乎其年冬兼著作郎奉詔撰國史欲為蘇綽立傳度家有奴曰豹生年七十矣本蘇氏部曲頗涉史傳略解屬文見度傳草因悲不自勝度問其故謂度曰豹生常受蘇公厚遇今見蘇公言驗是以悲耳郎君所有寶鏡是蘇公友人河南苗季子所遺蘇公者蘇公愛之甚蘇公臨亡之歲戚戚不樂常召苗生謂曰自度死日不久不知此鏡當入誰手今欲以著筮一卦先生幸觀之也便顧豹生取著蘇公自揲布卦卦

訖蘇公曰我死十餘年我家當失此鏡不知所在然天地神物動靜有徵今河汾之間往往有寶氣與卦兆相合鏡其往彼乎季子曰亦為人所得乎蘇公又詳其卦云先入侯家復歸王氏過此以往莫知所之也豹生言訖涕泣度問蘇氏果云舊有此鏡蘇公薨後亦失所在如豹生之言故度為蘇公傳亦具言其事於末篇論蘇公著筮絕倫默而獨用謂此也大業九年正月朔旦有一胡僧行乞而至度家弟勣出見之覺其神彩不俗更

邀入室而為具食坐語良久胡僧謂勣曰檀越家似有  
絕世寶鏡也可得見耶勣曰法師何以得知之僧曰貧  
道受明錄秘術頗識寶氣檀越宅上每日常有碧光連  
日絳氣屬月此寶鏡氣也貧道見之兩年矣今擇良日  
故欲一觀勣出之僧跪捧欣躍又謂勣曰此鏡有數種  
靈相皆常未見但以金膏塗之珠粉拭之舉以照日必  
影徹牆壁僧又歎息曰更作法試應照見腑臟所恨卒  
無藥耳但以金烟薰之玉水洗之復以金膏珠粉如法

拭之藏之泥中亦不晦矣遂留金烟玉水等法行之無  
不獲驗而胡僧遂不復見其年秋度出兼芮城令令廳  
前有一棗樹圍可數丈不知幾百年矣前後令至皆祠  
謁此樹否則殃禍立及也度以為妖由人興淫祀宜絕  
縣吏皆叩頭請度度不得已為之一祀然陰念此樹當  
有精魅所託人不能除養成其勢乃密懸此鏡於樹之  
間其夜二鼓許聞其廳前磊落有聲若雷霆者遂起視  
之則風雨晦暝纏繞此樹電光晃耀忽上忽下至明有

一大蛇紫鱗赤尾綠頭白角額上有王字身被數創死於樹下度便收鏡命吏出蛇焚於縣門外仍掘樹樹心有一穴於地漸大有巨蛇蟠泊之跡既而填之妖怪遂絕其年冬度以御史帶芮城令持節河北道開倉糧賑給陝東時天下大飢百姓疾病蒲陝之間癘疫尤甚有河北人張龍駒為度下小吏其家良賤數十口一時遇疾度憫之齋此入其家使龍駒持鏡夜照諸病者見鏡皆驚起云見龍駒持一月來相照光陰所及如冰著體

冷徹腑臟即時熱定至晚並愈以為無害於鏡而所濟者衆令密持此鏡遍巡百姓其夜鏡於匣中泠然自鳴聲甚徹遠良久乃止度心獨怪明早龍駒來謂度曰龍駒昨忽夢一人龍頭蛇身朱冠紫服謂龍駒我即鏡精也名曰紫珍常有德於君家故來相託為我謝王公百姓有罪天與之疾奈何使我反天救物且病至後月當漸愈無為我苦度感其靈怪因此誌之至後月病果漸愈如其言也大業十年度弟勣自六合丞棄官歸又將



遍遊山水以為長往之策度止之曰今天下向亂盜賊充斥欲安之乎且吾與汝同氣未嘗遠別此行也似將高蹈昔尚子平遊五嶽不知所之汝若追踵前賢吾所不堪也便涕泣對勸勸曰意已決矣必不可留兄今之達人當無所不體孔子曰匹夫不奪其志矣人生百年忽同過隙得情則樂失志則悲安遂其欲聖人之義也度不得已與之決別勸曰此別也亦有所求兄所寶鏡非塵俗物也勸將抗志雲路棲蹤烟霞欲兄以此為贈

度曰吾何惜於汝也即以與之勣得鏡遂行不言所適至大業十三年夏六月始歸長安以鏡歸謂度曰此鏡真寶物也辭兄之後先遊嵩山少室降石梁坐玉壇屬日暮遇一嵌巖有一石堂可容三五人勣棲息止焉月夜二更後有兩人一貌胡鬚眉皓而瘦稱山公一面闊白鬚眉長黑而矮稱毛生謂勣曰何人斯居也勣曰尋幽探穴訪奇者二人坐與勣談久往往有異義出於言外勣疑其精怪引手潛後開匣取鏡鏡光出而二人失

聲俯伏矮者化為龜胡者化為猿懸鏡至曉二身俱殞  
龜身帶綠毛猿身帶白毛即入箕山渡潁水歷太和視  
玉井井傍有池水湛然綠色問樵夫曰此靈湫耳村間  
每八節祭之以祈福祐若一祭有闕即池水出黑雲大  
電浸堤壞阜勸引鏡照之池水沸湧有雷如震忽爾池  
水騰出池中不遺涓滴可行二百餘步水落於地有一  
魚可長丈餘龐細大於臂首紅額白身作青黃間色無  
鱗有涎龍形蛇角嘴尖狀如鱗魚動而有光在于泥水

困而不能遠去勣謂鮫也失水而無能為耳刃而為炙甚膏有味以充數朝口腹遂出於宋汴汴主人張珂家有女子患病入夜哀痛之聲所不忍聞勣問其故病來已經年歲白日即安夜常如此勣停一宿及聞女子聲遂開鏡照之痛者曰戴冠郎被殺其病者牀下有雄雞死矣乃是主人七八歲老雞也遊江南將渡廣陵揚子江忽暗雲覆水黑風波湧舟子失容慮有覆沒勣攜鏡上舟照江中數步明朗徹底風雲四斂波濤遂息須臾

之間達濟天塹躋攝山麴芳嶺或攀絕頂或入深洞逢  
其羣鳥環人而噪數能當路而蹲以鏡揮之熊鳥奔駭  
是時利涉浙江遇潮出海濤聲振吼數百里而聞舟人  
曰濤既近未可渡南若不迴舟吾輩必葬魚腹勣出鏡  
照江波不進屹如雲立四面江水豁開五十餘步水漸  
清淺鼉鼉散走舉帆翩翩直入南浦然後却視濤波洪  
湧高數十丈而至所渡之所也遂登天台周覽洞壑夜  
行佩之山谷去身百步四面光徹纖微皆見林間宿鳥

驚而亂飛還履會稽逢異人張始鸞授勅周髀九章及  
明堂六甲之事與陳永同歸更遊豫章見道士許藏秘  
云是旌陽七代孫有咒登刀履火之術說妖怪之次更  
言豐城縣倉督李敬慎家有二女遭魅病人莫能識藏秘  
療之無效勸故人曰趙丹有才器任豐城縣尉勸因過  
之丹命祇承人指勸停處勸謂曰欲得倉督李敬慎家  
居止丹遽命敬為主禮勸因問其故敬曰三女同居堂  
內閣子每至日晚即靚粧銜服黃昏後即歸所居閣子


滅燈燭聽之竊與人言笑聲及至曉眠非喚不覺日日漸瘦不能下食制之不令粧梳即欲自縊投井無奈之何勣謂敬曰引示閤子之處其閤東有窓恐其門閉固而難啓遂晝日先刻斷窓櫺四條却以物支柱之如舊至日暮敬報勣曰粧梳入閤矣至一更聽之言笑自然勣拔窓櫺子持鏡入閤照之三女叫云殺我婿也初不見一物縣鏡至明有一鼠狼首尾長一尺三四寸身無毛齒有一老鼠亦無毛齒其肥大可重五斤又有守宮

大如人手身披鱗甲煥爛五色頭上有兩角長可半寸  
尾長五寸已上尾頭一寸色白並於壁孔前死矣從此  
疾愈其後尋真至廬山婆娑數月或棲息長林或露宿  
草莽虎豹接尾豺狼連跡舉鏡視之莫不竄伏廬山處  
士蘇賓竒識之士也洞明易道藏往知來謂勣曰天下  
神物必不久居人間今宇宙喪亂他鄉未必可止吾子  
此鏡尚在足下衛幸速歸家鄉也勣然其言即時北歸  
便遊河北夜夢鏡謂勣曰我蒙卿兄厚禮今當捨人間



遠去欲得一別卿請早歸長安也勣夢中許之及曉獨  
居思之恍恍發悸即時西首秦路今既見兄勣不負諾  
矣終恐此靈物亦非兄所有數月勣還河東大業十三  
年七月十五日匣中悲鳴其聲織遠俄而漸大若龍咆  
虎吼良久乃定開匣視之即失鏡矣

出異  
聞集



太平廣記卷二百三十